

LLOYD, DAVID (1724 - 1779), gweinidog Ariaidd

Enw: David Lloyd
Dyddiad geni: 1724
Dyddiad marw: 1779
Priod: Letitia Lloyd (née Lloyd)
Plentyn: Margaret Lloyd
Plentyn: Jenny Lloyd
Plentyn: David Lloyd
Plentyn: Charles Lloyd
Plentyn: John Lloyd
Plentyn: Richard Lloyd
Rhiant: Hester Lloyd (née Jones)
Rhyw: Gwryw
Galwedigaeth: gweinidog Ariaidd
Maes gweithgaredd: Crefydd
Awdur: Thomas Oswald Williams

Ganwyd yng Nghoedlannau-fawr, Llanwenog. Hanoedd ei dad o David ap Llewelyn Lloyd, arglwydd Castell Hywel, Ceredigion, yntau o linach yr [arglwydd Rhys](#). Ei fam oedd Hester, chwaer [Jenkin Jones](#) (1700? - 1742), Llwynrhydowen. Bu yn ysgol John Evans (1680 - 1741), Llanwenog. Ni bu yn academi Caerfyrddin, ond dywed [Thomas Morgan](#) iddo fod yn ysgol [Samuel Thomas](#), Caerfyrddin, yn 1743, gydag ef (*Cofiadur*, 1923, 10). Dywedir ei apwyntio yn olynydd i'w ewythr yn Llwynrhydowen (1742-79), Alltyplaca (1742-79), Penrhiw (1756-79), a'r Ciliau (1769-79), ond ni ordeiniwyd mohono hyd 1745. Yr oedd yn bregethwr huawdl. Prydyddai yn Gymraeg, ac yr oedd yn feistr ar Ladin, Groeg, a Hebraeg, a siaradai Ffrangeg ac Eidaleg yn rhugl. Ni cheir nemor ddim ysgrifenedig ar ei ôl ar wahân i'w farddoniaeth, ei lythyrau, a nodiadau o'i bregethau yn un o ddyddiaduron [Timothy Davis](#) (N.L.W. MS. 5496). Oddi wrth un o'i lythyrau, dyddiedig 29 Mai 1767, cesglir mai Ariad oedd. Am dymor byr bu'n cadw ysgol, ond gwrthododd swydd athro yn academi Caerfyrddin. Bu'n briod ddwywaith - yn gyntaf yn 1752 â'i gyfnither, ac yn ail yn 1759 â Letitia Lloyd o Lanfechan, hithau'n disgyn fel yntau o arglwyddi Castell Hywel. Yr oedd iddo chwech o blant: Jenny (o'r wraig gyntaf), Richard (gweinidog y Llwyn), John (tad [David Lloyd](#), Caerfyrddin), Margaret, y [Dr. Charles Lloyd](#), a David, o'r ail wraig.

' David Lloyd Brynlllefrith ' oedd yr athrylith grefyddol bennaf a'r dylanwad mwyaf o blaid crefydd rydd yng Ngheredigion, onid yng Nghymru gyfan; ym marn yr [arglwydd Aberdâr](#) (*Ymofynnydd*, 1946, 83) 'ef oedd yr unig Gymro hyd ei ddydd a enillodd glod Ewropaidd.' Bu farw 4 Chwefror 1779 yn 55 mlwydd oed a gorwedd ym mynwent eglwys Llanwenog. Ei weithiau yw ei lythyrau i'w frawd (*Lloyd Letters*), *Hymnau a Chaniadau* o waith [Jenkin Jones](#) wedi'u golygu ganddo, 1768, *Gwaith Prydyddawl Dafydd Llwyd*, 1785.

Awdur

Y Parchedig Thomas Oswald Williams, (1888 - 1965)

Ffynonellau

L. E. Lloyd-Theakston and John Davies, *Some family records & pedigrees of the Lloyds of Allt yr Odyn, Castell Hywel, Ffos y Bleiddiaid, Gilfach Wen, Llan Llyr and Waun Ifor* (Rhydychen 1912-1913) (Oxford, 1913)

G. Eyre Evans, *Lloyd Letters (1754-96)* (1908), 1908

D. E. Jones, *Hanes Plwyfi Llangeler a Phenboyr* (Llandysul 1899), 308

W. J. Davies, *Hanes Plwyf Llandyssul* (1896), 183-5

Hanes Eglwysi Annibynnol Cymru, ii, 19

Enwogion Ceredigion (1869)

Monthly Repository, 1817, 741

Monthly Magazine, Gorffennaf 1812

Yr Ymofynnydd, 1861, 17

1885, 116; 1890, 218; 1893, 261

J. Gwili Jenkins, *Hanfod Duw a Pherson Crist: athrawiaeth y Drindod a Duwdod Crist, yn bennaf yn ei pherthynas â Chymru*

(Liverpool 1931), 178-87

Dolenni Ychwanegol

Wikidata: [Q20732859](https://www.wikidata.org/wiki/Q20732859)

Dyddiad cyhoeddi: 1953

Hawlfraint Erthygl: <http://rightsstatements.org/page/InC/1.0/> 

Mae'r Bywgraffiadur Cymreig yn cael ei ddarparu gan Lyfrgell Genedlaethol Cymru a Chanolfan Uwchefrydiau Cymreig a Cheltaidd Prifysgol Cymru. Mae ar gael am ddim ac nid yw'n derbyn cymorth grant. Byddai cyfraniad ariannol yn ein helpu i gynnal a gwella'r wefan er mwyn i ni fedru parhau i gydnabod Cymry sydd wedi gwneud cyfraniad nodedig i fywyd yng Nghymru a thu hwnt.

Ewch i'n [tudalen codi arian](#) am ragor o wybodaeth.

